

Morning Dogri (NSD) Bulletin 24-05-2025

आकाशवाणी

- प्रधानमंत्री नरेन्द्र मोदी होर अज्ज नमीं दिल्ली च नीति आयोग दी गवर्निंग काउंसल दी 10मीं बैठक दी प्रधानता करडन।
- भारती रिजर्व बैंक दे डरैक्टरें दे बोर्ड नै माली बरे 2024-25 लेई लाहू दे इक हिस्से दे तौर पर 2 लख 68 जहार करोड़ रुपें शा मते दी रकम केंद्र सरकार गी मुंतकिल करने दी मंजूरी देई दित्ती ऐ।
- सर्वोच्च अदालतै सब्भनें केंद्रीय सशस्त्र पुलस बलें च 6एं म्हीने दे अंदर कैडर समीक्षा करने दा निर्देश दित्ता ऐ।
- भारत नै पाकिस्तान दे ज्हाजें लेई अपने ब्हाई खेत्तर पर लाई गेदी बंदिश गी 23 जून तोहडी बधाई दित्ता ऐ।
- अमरीका दी इक्क अदालतै बदेशी विद्यार्थियें गी दाखला देने लेई हार्वर्ड युनिवर्सिटी दा प्रमाणन रद्द करने दे ट्रम्प प्रशासन दे हुकमै पर अस्थायी रूप कन्नै रोक लाई दित्ती ऐ।
- भारत दे नेजा सुट्टने आहले खड्गारी नीरज चोपड़ा होरें चोरजाऊ च जानुसज कुसोचिन्सकी मेमोरियल प्रतियोगिता च चांदी दा तगमा हासल कीता ऐ।

<><><><><><>

PM-Niti Aayog

प्रधानमंत्री नरेन्द्र मोदी होर अज्ज नमीं दिल्ली च नीति आयोग दी 10मीं गवर्निंग काउंसल दी बैठक दी अध्यक्ष करडन। इस बरे दा सिरलेख ऐ विकसित भारत 2047 लेई विकसित राज्य।

इस बैठक च मुखमंत्री, उपराज्यपाल, केंद्री मंत्री ते नीति आयोग दे सी.ई.ओ, उपाध्यक्ष ते मैम्बर शामिल होडन। 10मीं गवर्निंग कौंसल बैठक च भारत गी इक विकसित राश्ट्र बनाने च राज्यें दी भूमिका पर सहमति बनाने ते देश दे विकास च बक्ख-बक्ख चुनौतिएं पर चर्चा करने आस्तै इक असरदार मंच उपलब्ध होग। बैठक च उद्यमिता गी बढ़ावा देने, कौशल विकास करने ते देश भरै च टिकाऊ रोजगार दे मौके पैदा करने पर बी विचार होग।

<><><><><><>

RBI

भारतीय रिजर्व बैंक दे बोर्ड ऑफ डायरेक्टज़ नै 2024-25 वित्तीय बरे च केंद्र सरकार गी रिकार्ड 2 लक्ख 68 ज्हार करोड़ रपे देने दी मंजूरी दित्ती ऐ। एह फैसला मुम्बई च लग्गी दी बोर्ड दी मीटिंग च लैता गेआ जेदी अध्यक्षता बैंक दे गवर्नर संजय मल्होत्रा होरें कीती। मीटिंग च घरेलू ते वैश्विक स्तर पर बनी दी आर्थिक स्थिति दा जायजा लैता गेआ ते भारतीय रिजर्व बैंक दी वार्षिक रिपोर्ट ते वित्तीय विवरण गी मंजूरी दित्ती गेई।

<><><><><><>

CAPFs

सर्वोच्च अदालतै आईटीबीपी, बीएसएफ, सीआरपीएफ, सीआईएसएफ ते एसएसबी सने सभनें केंद्रीय सशस्त्र पुलस बलें च 6एं म्हीने दे अंदर कैडर समीक्षा करने दा निर्देश दित्ता ऐ। एह समीक्षा, बरे 2021 च होनी ही, पर एहदे च चिर लग्गी गेआ। न्याऽमूर्ति अभय एस. ओका ते उज्जल भुइयां हुं'दी पीठे अमले ते सिखलाई सरबंधी विभाग गी कैडर समीक्षा ते मजूदा सेवा नियमें ते भर्ती नियमें दी समीक्षा दे सरबंधै च गृह मंत्रालय थमां रपोर्ट हासल होने दे त्र'उं म्हीनें दे अंदर उचित फैसला लैने दा निर्देश दित्ता। सर्वोच्च अदालतै औहद्धे पर

कम्म नेई करदे होई तन्खाह्णीं बधाने, कैडर समीक्षा करने ते भारती पुलिस सेवा दे अफसरें गी डेपुटेशन पर लाने दी प्रक्रिया खत्म करने लेई भर्ती नियमें दे परतियै गठन ते संशोधन दी मंग आहली केई याचिकाएं पर सुनवाई करदे होई एहू निर्देश जारी कीता। सर्वोच्च अदालत नै इब्बी आखेआ जे देशे दे बन्नै दी राक्खी सने अंदरूनी सुरक्षा जकीनी बनाने च थेह्ारबंद बलें दी अहम भूमिका ऐ। अदालतै आखेआ जे सशस्त्र बलें दी तैनाती कन्नै जुड़े दे केई मुद्दे न, जिं'दे च राज्य सरकारें ते राज्य पुलिस बल दे कन्नै तालमेल स्थापित करना बी मुख्ख तौर पर शामिल ऐ।

<><><><><><>

India-UNSC

संयुक्त राष्ट्र सुरक्षा परिषद च भारत नै सख्त शब्दें च पाकिस्तान दी आलोचना कीती ऐ ते दशकें थमां बन्ने पारा दा कीते जा'रदे आतंकवादी हमलें गी उजागर कीता ऐ। संयुक्त राष्ट्र च भारत दे स्थाई प्रतिनिधि पी. हरीश होरें इक खुली बैहस च पाकिस्तान पर आरोप लाया जे उन्नै सिविल नागरिकें गी ढाल बनाइयै आतंकवादिणं दा बचाव कीता ते दुनिया नै दिक्खी लैता ऐ जे आपरेशन सिंदूर दौरान मारे गेदे आतंकवादिणं गी पास्तनी नागरिकें श्रद्धांजलि दित्ती ही। उनें पाकिस्तान आसेआ भारत दे सीमावर्ती इलाकें च सिविल लोकें गी निशाना बनाइयै कीते गेदे हमलें दी निंदेआ कीती ते 26/11 आहले मुम्बई आतंकी हमले ते आप्रै 2025 आहले पहलगाम आतंकवादी हमले च पाकिस्तान दी भूमिका गी उजागर कीता। उनें

आखेआ जे आतंकवादिं ते नागरिकें गी बराबर दस्सने आहले मुल्खै गी नागरिक सुरक्षा दी गल्ल करने दा कोई अधिकार नेई ऐ।

<><><><><><>

US-Iran Talks

रोम च ईरान ते अमरीका बश्कार 5में दौर दी परमाणु वार्ता बिजन कुसै फैसले दे कल संपन्न होई गेई। ट्रम्प प्रशासन दे इक्क वरिष्ठ अधिकारी नै आखेआ जे अग्गे दी गल्लबात लेई दौनें मुल्ख तौले गै फही मिलने पर सैहमत होए ना। अधिकारी नै इब्बी दस्सेआ ऐ जे एहू गल्लबात बडी रचनात्मक रेई ऐ पर अजें बी इस दिशा च बड़ा मता कम्म कीता जाना बाकी ऐ।

ईरान दे बदेश मंत्री अब्बास अराघची होरें तकरीबन द'उं घैंटें तोहडी चली दी इस वार्ता दे बाद दस्सेया जे अमरीका दे कन्नै परमाणु वार्ता बडी गै पेचीदा होने दे कारण द'उं-त्र'उं बैठकें च पूरी नेई कीती जाई सकदी ऐ। श्री अराघची होरें वार्ता दी मेजबानी लेई इटली दे बदेश मंत्री एंटोनियो तजानी हुं'दा बी धन्नवाद कीता।

<><><><><><>

Pak-Flights Notam

भारत नै पाकिस्तानी ज्हाजें लेई जारी मौजूदा दिशानिर्देशें गी अगले म्हीने दी 23 तरीक तोड़ी लागू करी दित्ता ऐ। नागरिक उड्डयन मंत्रालय मूजब भारत दा वायु क्षेत्र पाकिस्तान च पंजीकृत ब्हाई ज्हाजें लेई बंद ऐ। नमीं दिल्ली च पत्रकारें कन्नै गल्ल करदे होई नागरिक उड्डयन मंत्री राम मोहन नायडू किंजारपू होरें आखेआ जे सरबंधित NOTAM गी अगले म्हीने दी 23 तरीक तगर लागू कीता गेआ ऐ ते भारत यथास्थिति गी बहाल रक्खोग।

<><><><><><>

PM-MKB

प्रधानमंत्री नरेन्द्र मोदी होर कल ऐतवारें 25 मई गी आकाशवाणी पर प्रसारित होने आहले अपने महावार रेडियो कार्यक्रम "मन की बात" राए देश विदेश च रोहने आहले लोकें कन्ने अपने विचार सांझे करडन।

हर म्हीने दे अखीरले ऐतवार प्रसारित होने आहले इस कार्जक्रम दी एहू 122मीं कड़ी होग। एहू कार्जक्रम 11 बजे आकाशवाणी ते दूरदर्शन दे समूलचे नेटवर्क पर प्रसारित कीता जाग। एहूदे कन्नोकन्नी प्रधानमंत्री हुंदे दफ्तर, सूचना ते प्रसारण मंत्रालय ते आकाशवाणी समाचार ते डी.डी न्यूज दे यू-ट्यूब चैनलें पर बी मन की बात कार्यक्रम उपलब्ध होग। मन की बात दे हिंदी प्रसारण दे तुरत मगरा एहूदा डोगरी भाषा च अनुवाद प्रसारित कीता जाग। एहूदे अलावा तुस एहूदा डोगरी अनुवाद इक बारी फी रातीं 8 बजे आकाशवाणी जम्मू पर सुनी सकदे हो।

<><><><><><>

US-Harvard-University

अमरीका दी इक्क अदालतै बदेशी विद्यार्थियों गी दाखला देने लेई हार्वर्ड युनिवर्सिटी दा प्रमाणन रद्द करने दे ट्रम्प प्रशासन दे हुक्मै पर अस्थायी रूप कन्ने रोक लाई दिती ऐ। ट्रम्प प्रशासन दे गृह मंत्रालय नै इक्क दिन पैहले गै हार्वर्ड युनिवर्सिटी दा बदेशी विद्यार्थियों गी दाखला देने दा प्रमाणन रद्द कीता हा। इस युनिवर्सिटी च लगभग 780 भारती विद्यार्थी बी हैन। हार्वर्ड युनिवर्सिटी दे अध्यक्ष एलन एम. गार्बर होरें इसी गैरकानूनी ते गैर-मुनासिब कार्रवाई करार दिंदे होई एहूदी निंदेआ कीती ऐ।

ट्रम्प प्रशासन नै फिलिस्तीन समर्थक प्रदर्शनें ते यहूदी विद्यार्थियों पर हमलें कन्नै निब्बड़ने च युनिवर्सिटी दी लापरवाही करी युनिवर्सिटी दी सारी सरकारी सहायता निलंबित करी दिती ऐ। प्रशासन नै युनिवर्सिटी दी टैक्स-ब्लूट सुविधा गी बी रद्द करी दित्ते दा ऐ।

<><><><><><>

Neeraj-Javelin

भारत दे स्टार खडारी नीरज चोपड़ा होरें पोलैंड च 2025 जानुसज कुसोचिन्सकी मेमोरियल प्रतियोगिता च चांदी दा तगमा जित्तेआ ऐ। दो बारी दे ओलंपिक पदक विजेता नीरज चोपड़ा नै 84 इशारिया 1-4 मीटर नेजा सुट्टियै एह जित्त हासल कीती। जर्मनी दे Julian Weber नै 86 इशारिया 1-2 मीटर दूर नेजा सुट्टियै सुन्ने दा तगमा जित्तेआ।

<><><><><><>

IPL-Cricket

आईपीएल क्रिकेट च अज्ज जयपुर च पंजाब किंग्स दा मुकाबला डेल्ही कैपिटल्स कन्नै होगा। एह मैच संझां साढे 7 बजे थमां खेड्डेआ जाहगा। तोआई कल रातीं लखनऊ च सनराइजर्स हैदाराबाद नै रॉयल चेंलेजर्स बंगलुरू गी 42 रन्जें कन्नै हराई दित्ता। 232 रन्जें दे लक्ष्य दे जोआब च बंगलुरू दी टीम 19 ओवरें ते 5 गेंदें च 1 सौ नानवे रन्जें पर गै सिमटी गई।

सनराइजर्स दे कप्तान पैट कमिन्स नै 3 जदके ईशान मंलिगा नै द'उं विकटां हासल कीतीआं। एहदे शा पैहले सनराइजर्स हैदाराबाद नै पैहले बल्लेबाजी करदे होई तय 20एं ओवरें च 6

विकेटां मुहाइयै 231 रन्ज बनाए। ईशान किशन नै 48 गेंदें च 94 रन्जें दी शानदार नाबाद पारी खेड्डी ते उ'नेंगी प्लेयर ऑफ द मैच घोषित कीता गेआ।

<><><><><><>

IMD-Weather

मौसम विभाग नै अज्ज केरल, दक्खनी कोंकण, कर्नाटक दे समुंदरी कंडू आहले इलाकें, मध्य महाराष्ट्र, गोवा ते राजस्थान दे पच्छमी हिस्सें च मौहलेधार बरखा दा रेड अलर्ट जारी कीता ऐ। तमिलनाडु, कर्नाटक, गुजरात, राजस्थान, महाराष्ट्र मध्यप्रदेश, छत्तीसगढ़, उत्तराखंड, हिमाचल प्रदेश, बिहार ते असम च बी तेज बरखा बरने दा अरिंज अलर्ट जारी कीता गेआ ऐ। केरल, माहे ते समुंदरी कंडू आहले कर्नाटक च अगले 2 शा त्र'उं दिनें तगर बडी मती तेज बरखा बरने दा अनुमान ऐ। मध्य महाराष्ट्र, गुजरात, तमिलनाडु, पुद्दुचेरी कराईकल ते तेलंगाना च अगले त्रै शा 4 दिनें तोहडी मौहलेधार बरखा दी संभावना ऐ। तोआई, दिल्ली ते आले-दोआले दे इलाकें च तेज हवां चलने ते गरज-चमक दे कन्नै हौली बरखा बरने दा अनुमान ऐ।

मौसम विभाग मूजब पूर्वी राजस्थान ते जम्मू दे किश हिस्सें च अगले 2 दिनें तगर लू जनेय हालात बने दे रेई सकदे ना।

<><><><><><>